

欽定全唐文

欽定全唐文卷七十二目錄

文宗

四

令節度等使朝覲先行奏聞詔

借粟河東詔

令御史疏理冤結詔

赦宋申錫餘黨詔

委中書門下丞撰錄時政詔

簡計應修陵寢詔

禁與蕃客交關詔

量放駁選人濫行陳訴詔

答蕭俛乞致仕詔

令王彥威定鄆曹等州稅務詔

答魏暮諫疏詔

拯卹疾疫詔

答王涯奏準勅詳定禮制詔

令諸司錄囚詔

立魯王永爲皇太子詔

卻上尊號詔

卹災詔

令出使郎官御史條奏所歷州縣政績詔

令宣武軍節度使李程兼充亳州太清宮使詔

答殷侑請獻所餘軍賦詔

令百姓收贖男女詔

禁鞭背詔

禁逾限勘覆詔

增設齋人數詔

疏理刑獄詔

卷之二十一
令刑官立限決囚詔

答蕭俛辭少師詔

定輶朝例詔

委監察御史省視太廟郊社齋事詔

以太師渾瑊配享德宗廟庭詔

除朋黨禁詔

賞誅鄭注功臣軍士詔

覈實選人出身詔

封衛方厚妻程氏武昌縣君詔

褒賜顏從覽等官爵詔

放免安南秋稅詔

命故信王孫林嗣爵詔

停私覲官員詔

欽定全唐文卷七十二

文宗

四

令節度等使朝覲先行奏聞詔

方面大臣皆吾股肱心膂思與相見無時蹠忘想其懸闕
之心願奉修覲之禮其於忠懇悉亦可知但緣兵革初停
務先安輯或地隣戎寇須有防虞或鎮重軍雄切於綏撫
臨機處分要合便宜自今已後諸道節度團練防禦經略
等使有朝覲者但先獻表章候得詔旨允許即任進發使
行止之際臨時不失事機故此宣示想各知悉

借粟河東詔

河東兵戈之後亢旱踰年倉廩空虛黎元困乏若無救恤恐至流亡宜借便粟十萬石

令御史疏理冤結詔

方春用事寒氣稍侵京城見禁囚徒慮有冤結宜令御史兩人各就本司疏理以聞

赦宋申錫餘黨詔

朕以菲德奉茲丕構雖虔恭修己不敢暇逸而誠亮格物未能宏敷遂使姦凶懷非覬之端藩戚陷無君之責外詿

宰臣傍連禁吏怵惕自咎中宵靡寧親臨鞫訊改寘刑典
顧爲大義實愧御家猶慮檢校之徒忿怨相冒遂至誣引
或連非辜載懷覲慙宜諭深旨應緣漳王及宋申錫等被
論告事除今月六日已前準勅旨處分並捕捉王師文一
人外餘並一切不問宣示中外用體朕懷

委中書門下丞撰錄時政詔

史官記事用戒時常先朝舊制並得隨仗其後宰臣撰時
政記因循斯久廢墜實多自今後宰臣奏事有關獻替及
臨時處分稍涉政刑者委中書門下丞一人隨時撰錄每

卷之二
季送史館庶警朕闕且復官常

簡計應修陵寢詔

所修陵寢事至嚴重簡計崇飾須得精實宜令度支郎中盧商將作少監韋長同往諸陵子細簡計具合修與不合處聞奏

禁與蕃客交關詔

如聞頃來京城內衣冠子弟及諸軍使並商人百姓等多有舉諸蕃客本錢歲月稍深徵索不得致蕃客停滯市易不獲及時方務撫安須除舊弊免令受屈要與改更自今

已後應諸色人宜除準勅互市外並不得輒與蕃客錢物
交關委御史臺及京兆府切加捉搦仍即作條件聞奏其
今日已前所欠負委府縣速與徵理處分

量放駁選人濫行陳訴詔

南曹簡勘廢置詳斷選人倘有屈事足以往覆辨明近年
已來不問有理無理多經中書門下接訴致令有司失職
莫知所守選人踰分惟望哀矜若無條約恐更滋甚起今
已後其被駁選人若已依期限經廢置詳斷不成自謂有
屈任經中書門下陳狀狀到吏部後銓曹及廢置之吏更

爲詳斷審其事理可收即收如數至三人已上廢置郎官請牒都省罰直如至十人已上具事狀申中書門下取處分如未經廢置詳斷公然越訴或有已經詳斷不錯輒更有投論者選人量殿兩選當具格文榜示冀無冤濫亦免倖求

答蕭俛乞致仕詔

新除太子少師蕭俛代炳台曜躬茂天爵文可以經緯邦俗行可以感通神祇夷澹粹和精深敏直以忠讜侍從於憲祖以器能弼諧於穆宗臯陶陳九德之謀楊震有四知

之慎進退由道周旋令名近以師傅之重疇於舊德俾從
優禮冀保頤貞而抗疏辭疾勇退知止嘗亦敦諭確乎難
拔遂茲牢讓厚我時風俾進秩於端僚仍加榮於貴綬疊
示光寵式彰名臣於戲昔干木偃息猶藩魏君子房薦神
亦扶漢嗣無使二哲專美於前始終懿圖敬服休命可銀
青光祿大夫守尚書左僕射致仕

令王彥威定鄆曹等州稅務詔

鄆曹濮淄青登齊萊兗海沂密等十二州自頃年收復已
來屬中外多故徵賦輕重或未均平今三道守臣無非循

吏百姓安逸流亡盡歸須於此時立一經制宜令諫議大夫王彥威充勘定兩稅使仍與令狐楚等審商量其兩稅榷酒及徵物匹數虛實估價並留州留使上供等錢物斛斗比類諸道一一開項分折平均攤配立一定額使人知常數不可加減迴日具件聞奏

答魏暮諫疏詔

昔在乃祖貞觀中諫疏十上指事直言無所避諱每覽國史未嘗不沈吟伸卷嘉尚久之爾爲拾遺其風不墜屢獻章疏必道其所以至於備灑掃於諸王非自廣其聲伎也

恤髫亂之宗女固無嫌於徵取也雖然疑似之間不可家至而戶曉爾能詞旨深切是博我之意多也噫人能匪躬譽諤似其先祖吾豈不能虛懷延納仰希貞觀之理歟而謫居官日淺未當敘進吾豈限以常典以待直臣可右補闕

拯卹疾疫詔

朕聞王者之理天下一物失所興納隍之咎一夫不獲歎時予之辜雖饑疫凶荒國家代有而陰陽祲沴微戒朕躬自諸道水旱害人疫疾相繼宵旰罪已興寢疚懷屢降詔

書俾副勤恤發廩蠲賦救患賑貧亦謂至矣今長吏申奏
札瘥猶甚蓋教化未感於蒸人精誠未格於天地法令之
或爽官吏之或非百姓稱冤稅役多弊姦賦未去農業失
時有一於茲皆傷和氣並委內外文武常參官一一條疏
各具所見聞奏必當親覽無憚直言其諸道應災荒處疾
疫之家有一門盡死者官給凶具隨事瘞藏一家如有口
累疫死一半者量事與本戶稅錢三分中減一分死一半
已上者與減一半本戶稅其疫未定處並委長吏差官巡
撫量給醫藥詢問救療之術各加拯濟事畢條疏奏來其

有一家長大者皆死所餘孩稚十二至襁褓者不能自活必至夭傷長吏勸其近親收養仍官中給兩月糧亦具數聞奏江南諸道既有凶荒賦入上供悉多蠲減國用常限或慮不充其度支鹽鐵戶部及百司除諸軍衣糧布帛及宗廟祭享切急所須並常科用外所有舊例市買貯備雜物一事已上並仰權停待歲熟時和別舉處分於戲朕自臨御於今七年兢兢乾乾不敢自逸而冲昧寡德未能變調謨旱水災或罹於藩郡天亡疾苦或害於生人悼於厥心省已自責其州府長吏各奉詔條勉加拯恤凡在中外

宜體朕懷

答王涯奏準勅詳定禮制詔

理道所關制度最切近者風俗踰侈歲月滋甚人墮本業
用多費財爰命有司載舉彝制務從簡樸度可久行將使
尊卑有倫刑罰少息其喪葬婚嫁吉凶禮物皆有著定尤
聞僭差雖不在條件之物亦委所司準令式勾當仍切加
捉搦不得輒有容縱軍國異容古今通禮禁軍仗衛雜飾
及諸道節度等使應緣軍裝衣服即不在此限或有留令
慢法委御史臺彈奏當坐長吏用清頽風

令諸司錄囚詔

秋稼方茂時稍愆亢慮有冤繫致傷和氣應內外諸司見
禁囚徒各委本司長吏隨罪疏決務從寬典副我憂懷

立魯王永爲皇太子詔

禮重承祧義存繼體思崇守器必務建儲王者所以固大
本而貞萬國也魯王永溫仁寬明聰敏孝愛動合至性居
無放心樂善承顏曠度容衆恭勤詩書之教率由忠愿之
風懿茲徽猷光我上嗣朕纂奉寶位丕寧聖圖欽若舊章
用建儲貳爰俾主鬯以率問安統正龍樓之榮昭宣甲觀

之兆宜膺茂典允屬元良可冊爲皇太子仍令所司擇日備禮冊命

卻上尊號詔

朕以否德纂承睿圖業業乾乾懼不克荷是用法天地無私之道以成化象日月無私之照以燭幽慕唐堯虞舜之爲君繼貞觀開元之致理朕以夕惕宵興不遑暇逸冀將紹復聖哲保綏華夷至於洪名尤不輕議尚未富庶豈可屬心卿等台鉉重臣翼宣元化宜翊朕志臻於緝熙今陰雪傷和尚資寬宥乃以文武至德加於朕躬省視奏章難

從虛美宜斷來表深諒予懷

卹災詔

朕嗣纂聖圖覆育生類兢業寅畏上承天休而陰陽失和
膏澤愆候害我稼穡災於黔黎有過在予敢忘咎責是用
避殿徹樂減膳省刑思惕慮以覃思庶薦誠而致雨時澤
未降已來朕當避正殿減供膳太常教坊聲樂權停閱習
飛龍廄馬量減食粟其百司官署廚饌亦且權減陰陽鬱
埋紮繫傷害有紊和氣是乖變調今放出官人一千人其
諸道今年合進鷹犬宜數內停減一百頭聯在五坊者宜

減放一百頭聯京城囚徒慮有冤滯已委疏決務從寬降
宜令鄭覃令狐楚速具條疏聞奏內外諸司先有修造稍
非急切者並宜停省公卿百僚及戚里舊將相之家如有
僭侈踰制委御史臺糾察聞奏諸州府長吏及縣令有貪
縱苛暴者委御史臺訪察聞奏名山大川及能興雲致雨
者各委長吏精誠祈禱於戲朕受天眷佑爲人父母嘆旱
作沴焦勞匪寧徧祀山川靡愛珪璧菲食罪已緩獄消災
載深勤兩之心冀警納隍之戒凡百士庶宜諒予懷

令出使郎官御史條奏所歷州縣政績詔

前後制勅應諸道違法徵科及刑政冤濫皆委出使郎官
御史訪察聞奏雖有此文未嘗舉職向外生人勞弊朝廷
莫得盡知自今已後應出使郎官御史所歷州縣其長吏
政績間間疾苦及水旱災傷並一條錄聞奏郎官宜委
左右丞勾當法官委大理卿勾當限朝見後五日內聞奏
並申中書門下如訪知所奏事不實必加懲責其奏舉稱
職者則議優獎

令宣武軍節度使李程兼充亳州太清宮使詔

聖人立極教本奉先王者配天義惟尊祖我太祖元元皇

帝肇開寶運垂祚有唐致六合於大同躋羣生於壽域保茲鴻業實賴貽謀如聞亳州太清宮頻經水潦頗以摧毀永惟誕聖之地敢忘崇本之誠宜令宣武軍節度使李程兼充亳州太清宮使仍委漸加修葺以時致敬稱朕意焉

答殷侑請獻所餘軍賦詔

鄭曹濮等州元和以來地本殷實自分三道十五餘年雖頒詔書竟未入賦殷侑承兵戈之後當歉旱之餘勤力奉公謹身守法纔及周歲以致阜安而又體國輸忠率先入貢成三軍奉上之志陳一境樂輸之心尋有表章良用嘉

歎

令百姓收贖男女詔

蘇州大水饑歉之後編戶男女多爲諸道富家並虛契質
錢父母得錢數百米數斗而已今江南雖豐稔而凋殘未
復委淮南浙江東西等道如蘇湖等州百姓願贖男女者
官爲詳理不得計衣食及虛契徵索如父母已歿任親收
贖如父母無資而自安於富家不厭爲賤者亦聽

禁鞭背詔

朕比屬暇日周覽國史伏讀太宗因閱明堂孔穴經見五

臟之繫咸附於背乃下制決罪人不得鞭背且人之有生
繫於臟腑灸針失所尚致夭傷鞭扑苟施能無枉橫況五
刑之內笞最爲輕豈可以至輕之刑傷至重之命朕躬承
丕業思奉貽謀言念於茲載懷惻隱其天下州府應犯輕
重罪人除情闢巨蠹法所難原者其他過誤罪愆及尋常
公事違法並宜準貞觀四年十一月十七日制處分不得
鞭背今年已後每至夏至已後立秋已前犯罪人就州府
常條之中亦宜量與矜減速爲疏理不得久令禁繫委御
史臺切加糾察永爲常式

禁逾限勘覆詔

如聞大理寺所覆諸州府刑獄皆盤勘微細節目不早詳
斷道路遐遠往返經年非惟囚禁多時有傷和氣兼亦覬
望恩澤故涉稽留爲弊頗深須有提舉宜令御史臺切加
糾察準勅限較科推狀中有贓數異同及罪人伏款未盡
者即許移牒盤問其他煩碎事條不關要節者並不得更
令移牒勘覆

增設齋人數詔

忌辰修齋雖出近制斟酌損益貴於得中況在不遷之宗

允資異數之禮五月六日二十六日兩忌設齋人數宜各
加至二千人太穆文德皇后忌日亦宜各加倍數其寺觀
仍舊十二月八日忌宜於五所寺觀共設四千人宜令所

司準式

疏理刑獄詔

近者咎徵所集陽亢成災靡神不宗未獲嘉應豈刑政之
尚乖其當將獄犴之未察其冤夙興以思庶答天譴宜令
尚書右僕射李逢吉御史大夫鄭覃於尚書省疏理刑獄
輕繫者咸從於決遣重條者議所以矜寬小大以情必詳

必慎致誠無忘稱朕意焉

令刑官立限決囚詔

時屬亢陽慮有冤繫應諸州府囚徒各委所在長吏疏理處分務從寬降其緣制獄未決遣者委刑部大理寺速立限奏覆稍涉留滯者仍令御史臺糾劾舉奏

答蕭俛辭少師詔

不待年而求謝於理身之道則至矣其如朝廷之望何銀青光祿大夫新授太子太傅上柱國襲徐國公蕭俛朕以肇建元良精求師傅遐思漢朝故事韋元成石慶並當時

名德咸爲此官吾以元子幼冲慎於教誠欲以累汝發明古今冀忠孝之道日聞於耳特輒左右至於林廬而卿高蹈翛然屏絕進趣遠邁令弟還吾詔書天爵自優冥鴻方遠不轉之志堅然若山循省來章致煩爲愧終以呂尚之秩遂其疏廣之心勵俗激貪所補多矣有益於政寄聲以聞亦有望於舊臣也可太子太傅致仕

定輶朝例詔

官至丞郎皆朕所委不幸云亡者宜其爲之廢朝況朝會班列本在諸司三品之上比限近勅或乖通理時因敬休

殞喪載深傷惻自今丞郎宜準諸司三品官罷朝一日

委監察御史省視太廟郊社齋事詔

王者受天地之明命續祖宗之鴻業所以祗服大事致誠嚴禋盡其孝敬之心崇其郊祀之禮必在匪懈不忒粢盛豐潔古今丕訓無易於此朕嗣位十載恭臨萬邦務三時以厚生睦九族以修教每厲薄德汔茲小康中宵內愧懼不克稱實天地之眷佑祖宗之威靈思欲罄其精誠奉以昭報豈聿懷之敢望實如在而齋心如聞近歲有司因循將事不恪牲牷無滌具之別籩豆乏靜嘉之容鼎俎雖陳

薦羞多闕祠官或怠於齋肅胥吏有至於喧呶虧禮瀆神
莫斯爲甚永言重事用懼深衷起今已後太廟郊社齋郎
先事前一日委監察御史子細點簡如有替代非正身者
當時禁身推問聞奏當重科懲既責躬親須議優獎其齋
郎委中書門下商量量與減選應緣祠祭官下至齋郎及
太常樂人吏等致齋日有博奕飲酒喧呼爭競者亦委御
史臺糾察聞奏其牲牢準禮循行之際合視肥瘠之宜近
日相承臨時取辦既乖誠敬頗失舊章委太僕寺準禮令
處分如無本色牛羊速具聞奏至於酒醴醯醢簠簋膳羞

各委本公司準禮令切加提舉凡在廟壙所宜肅敬縱云隙
地豈廢修崇如有耕墾藝植者亦委御史臺糾察聞奏攝
事公卿雖約官品將朕誠敬必在得人委尚書省差定之
時稍加慎選其祭器禮物中如有欠闕及濫惡須慎補改
張者委太常宗正光祿太僕寺少府監諸司速具條疏聞
奏仍委中書門下即與疏理處分於戲禮崇明祀神享至
誠上下苟無其違心虔恭必冀於備物繇是怵惕興感齊
莊致詞咨爾庶工各揚厥職式遵禮典稱朕意焉

以太師渾瑊配享德宗廟庭詔

旌勸是先允協念功之義薦羞爰舉聿追配饗之儀贈太
師渾瑊鍾秀誕靈逢時翼聖銘鏤金石帶礪山河績旣著
於先朝業宜光於後嗣俾之從祀用表遺勲宜配享德宗
廟庭

除朋黨禁詔

朕承天之序燭理未明勞虛襟以求賢勵寬德以容衆頃
者或台輔乖弼亮之道而具僚扇朋附之風翕然相從實
斅彝憲致使薰蕕共器賢不肖並馳退跡者成後時之夫
登門者有迎吠之客繆鑿之氣堙鬱和平而望陰陽順時

疵癣不作朝廷肅清班列和安自古及今未嘗有也今既再申朝典一變澆風掃清明比之徒整飭貞廉之俗凡百卿士惟新令猷如聞周行之中尚蓄疑懼或有妄相指目令不自安今斯曠然明諭朕意應與宗閔德裕或親或故及門生舊吏等除今日已前黜遠之外一切不問各安職業勿復爲嫌布告中外令其知悉

賞誅鄭注功臣軍士詔

朕以寡德祇荷睿圖於茲十年夙夜惟寅嘗恐至誠不達景化未敷屈已以安四方推信以待百辟豈有患生毗倚

變起姦凶亦以失於任人致此氛沴然朕爲人父母子育生靈憂萬姓之靡寧懼一物之失所況至理之代先德而後刑以上下歡康中外清晏慮有連累即傷太和宜賞不逾時式彰褒勸其今月二十一日排難宣力功成謀議及能應機梟斬鄭注者節級各加官賞其次立功及軍隊將士合在賞級者即有差等處分其將校等合與改轉委本軍條疏具名聞奏謀逆之人已斷腰領子戮家破俾當極誅元惡李訓王涯家族除已處置外妻女奴婢並入官資貨產業天下所在切加簡責據數聞奏其餘親黨除同居

知情外不同謀計者一切不問諸色官吏所縣其受逆長
指合欲出力同惡者並已兩軍推問尋捕處斬訖尚慮因
緣讎隙妄告平人自今已後縱同官司微涉詐誤者一切
不問潛藏疑懼者許三日內各歸本司不得輒相恐動韓
約首爲詐惡逆罪滔天雖羅捕未獲終天網不漏宜委御
史臺京兆府兩金吾速催促所繇齊出搜索獲日聞奏如
輒有人隱藏不告者罪及一門如知處隱藏密來告說者
必當厚有賞賜於戲朕求理之心惟才是與聽言信行不
慮包藏豈謂邪人負我如此其中誘陷必有脅從須挂刑

名載深冤歎其中節目疏理未盡須更商量者委中書門下續即條奏宣示遠邇咸使聞知

覈實選人出身詔

中書門下吏部各有甲庫籍天下諸色出身以防踰濫諸道應奏諸色官改轉悉下三庫以稽其實委給事中中書舍人吏部格式郎中各與本甲庫官具有無異同申中書門下然與進擬如諸司使所奏不實或以無爲有各加懲殿以絕奸源

封衛方厚妻程氏武昌縣君詔

故邕州都督府錄事參軍衛方厚妻程氏乃者吏爲不道
虐殺爾夫詣闕申冤徒步萬里崎嶇偏畏濱於危亡血誠
旣昭幽憤果雪雖古之烈婦何以加焉如聞孤孀無依晝
哭待盡俾榮祿養仍錫疏封可武昌縣君仍賜一子九品

正員官

褒賜顏從覽等官爵詔

朕每覽國史見忠烈之臣未嘗不嗟歎久之思有以報如
聞從覽宏式實果卿真卿之孫永惟允原既不可作旌其
嗣續諒協典彝考績已深於宦途者命列於中臺官次未

金文卷之三

卷之三

三

·

·

齒於摺紳者俾佐於左輔庶使天下再新義風
放免安南秋稅詔

遠人征賦每歲徵輸言念辛苦暫爲蠲免其安南今年秋
稅悉宜放免委都護田早集百姓曉示恐軍用闊絕宜賜
錢二萬貫以嶺南觀察使合送兩稅供錢充

命故信王孫林嗣爵詔

朕因暇日嘗幸戚藩引見諸王爰加錫宴而故信王孫林
行列之間皤然白首問其年齒則七十而有七詢其昭穆
則元宗之雲孫朕仰思開元之時威明之禮大體承訓迨

於朕躬惕然動懷當食興歎況尊祖之義立愛自親尚齒
之文縣家刑國觀其威儀甚整視聽不衰載懷愍矜所宜
敬異永惟烈祖之德用錫孝孫之慶旌其祚裔特舉徽章
遽申開府之秩寵以分茅之貴俾從異等式是殊恩可封
信王仍賜開府儀同三司

停私覲官員詔

仕雜工商實因鬻爵尚須命使改以賜財其入蕃使舊例
與私覲官十員宜停別與錢五十貫文令度支分付永爲
定例

欽定全唐文卷七十三目錄

文宗五

彗星見修省詔

祈雨詔

祭終南山詔

命長吏祈雨詔

命宰臣祈雨詔

定慶成節宴會常例詔

授嘉王運等金紫光祿大夫檢校司空并給料錢

詔

賜令狐楚謚詔

罷童子科詔

更定駙馬爲公主服制詔

賜蕭俛手詔

優卹旱蝗諸州詔

遣使宣慰諸道詔

彗星再見修省詔

罷軍將兼充文職詔

給裴度俸料詔

禁留獄詔

許越王貞元孫女元真請祔葬臨淮公珍以下四

喪於舊塋詔

答滄景節度使劉約請開義倉詔

褒錄王鍔後嗣詔

流蕭洪詔

流蕭本蕭宏詔

罰鄭滑節度使裴宏泰俸料詔

禁國忌日設齋行香詔

令臺司覆勘賀蘭進興黨與詔

立潁王爲皇太弟勾當軍國詔

贈崔琯尚書左僕射詔

虔奉祀事詔

遺詔

欽定全唐文卷七十三

文宗

五

彗星見修省詔

朕嗣守丕構對越上元虔恭寅畏於今一紀何嘗不宵衣
念道昃食思愆師周文之小心慕易乾之夕惕懼德不類
貽列聖羞欲致和平時無災咎然誠未感物謫見於天仰
愧三靈俯慙衆彙思獲攸濟浩無津涯昔宋景發言星因
退舍魯僖納諫饑不害人取鑒往賢深惟自勵載軫在予
之責宜布恤辜之恩式表殷憂冀答昭戒應在京城百司

及天下州府見禁囚徒各委長吏親自鞫問罪合死者降
從流流已下並釋放惟故殺人及官典犯贓并主掌錢穀
之吏計較盜竊者不在免限揚州楚州浙西管內諸郡如
聞去年稍旱人罹其災豈可重困黎元更加誅斂爰布蠲
除之令用申拯物之情宜委本道觀察使於兩稅戶內不
支濟者量議矜減今年夏稅錢物每貫作分數蠲放分析
速奏仍於供上及留州使額內相均落下務令蘇息膏澤
不愆播種伊始土木興役恐妨農功禁中及百司所有修
造並宜權停韶陽御辰生氣方盛思全物類以順天時內

外五坊凡有籠養鷹鵠及鷄鴨狐兔等悉宜放之起今月
一日至五月三十日禁京師畿內採捕禽獸羅網水蟲以
遂生成永爲定制委臺府及本軍本司切加禁止唐州畫
劫縣官桂管聚集妖人或始於計窮或迷於誘導嘯聚未
散伏藏山林者各委本處長吏遣人宣諭恩旨便令放歸
鄉貫田里俾安家業勿更根尋所犯如不從制命不在此
限朕今素服避殿命太常徹樂大官減膳一日常費分爲
一旬近者內外臣僚繼獻表章徵引故實請冊尊號夫道
大爲皇德大爲帝朕膺此稱祇愧已多矧踵星變之災敢

議名揚之美非懲既往且儆將來宰臣百僚及諸道節度觀察等使更不用奏請如表已在道路及到者並宜卻還常參官及諸州府長吏如有規諫者各上封事極言得失陳救災之本明致理之方咸竭乃心以俾厥辟於戲朕明誠未感化理未孚謹告在天丁寧斯甚所宜盡意與我同憂勉進嘉言共凝庶績弼違納誨副茲虛懷宣示内外各令知悉

祈雨詔

自春以來未降甘澤從來但以過時無雨始議祈禱及至

降灑已似後時今雖未旱亦要沾洽各宜差官精誠祈禱

祭終南山詔

每聞京師舊說以爲終南山興雲即必有雨若當晴霽雖密雲他至竟不霑濡況茲山北面闢廷日當恩顧修其祀寵數宜及今聞都無祠宇巖谷闕湫卻在命祀終南山未備禮秩湫爲山屬捨大崇細深所謂闢於興雲致雨之祀也宜令中書門下且差官設奠宣告恩禮便令擇立廟處所迴日以聞命有司即時建立

命長吏祈雨詔

農人徧野甘澤稍愆眷言時苗未保收穫齋心懇禱猶望
有成各宜差長吏所在靈廟禱祈

命宰臣祈雨詔

秋旱未雨慮有幽冤繩禁多時須議疏決京師刑獄宜令
右僕射兼門下侍郎平章事鄭覃親往疏理仍分命宰臣
祈雨於太廟太社白帝壇

定慶成節宴會常例詔

慶成節朕之生辰天下錫宴庶同歡泰不欲屠宰用表好
生非是信尚空門將希無妄之福恐中外臣庶不喻朕懷

廣置齋筵大集僧衆非獨凋耗物力兼恐致惑生靈自今宴會蔬食任陳脯醢永爲常例咸使聞知

授嘉王運等金紫光祿大夫檢校司空并給料錢

詔

書載堯典首陳睦族詩歌周德實美維城朕嗣統百王憲
章二代義雖本於敘族道無愧於尊賢式遵舊章爰舉成
命嘉王遵循王邁恭王通等孝敬恭恪敏裕齋莊播蘭茝
之清芬炳珪玉之符采易凌沛獻詩掩楚元古人素風造
次於是師氏典訓周旋以之固可以超金紫之貴階升台

鉉之崇秩策勲詔爵以寵分茅並可金紫光祿大夫檢校司空賜上柱國仍依百官例給料錢勅檢校吏部尚書安王溶檢校兵部尚書潁王灝宜並從百官例賜料錢

賜令狐楚謚詔

生爲名臣歿有理命終始之分可謂兩全然以鹵簿哀榮之末節難違往意誅謚國家之大典須守彝章鹵簿宜停易名須準舊例

罷童子科詔

諸道應薦萬言童子等朝廷設科取士門目至多有官者

合詣吏曹未仕者即歸禮部此外更或延引則爲冗長起今後不得更有聞薦俾繇正路冀絕倖門

更定駙馬爲公主服制詔

制服輕重必資典禮如聞往者駙馬爲公主行服三年緣情之義殊非故實違經之制今乃聞知宜令朞周永爲定制

制

賜蕭俛手詔

卿道冠時髦業高儒行著作礪濟川之效宏致君匡國之規留芳巖廊逸老林壑累降褒詔亟加崇秩而志不可奪

情見乎辭鴻飛入冥吟想增歎今賜絹三百匹以備山谷所乏便遣蕭倣過彼宣付想宜知悉

優卹旱蝗諸州詔

門下朕嗣守丕訓恭臨大寶兢兢業業十有三年何嘗不惠下以愛人克己以利物外無畋遊之樂內絕土木之功浣衣菲食宵興夕惕厚於身者無不去便於人者無不行損羣方之底貢驅時風於樸素將以宏祖宗法度致夷夏雍熙心雖勞於九垓道未進於一取顧惟不德慙歎方深今雖遐邇甫寧忠良叶志五兵戢其鋒刃百姓絕其征行

勤求理道日冀平泰而去秋旱蝗所及稼穡卒痒哀此蒸人懼罹艱食是用順時布令助煦育之深仁施惠覃恩法雨露之殊澤其淄青兗海鄆曹濮去秋蟲蝗害物偏甚其三道有去年上供錢及斛斗在百姓腹內者並宜放免今年夏稅上供錢及斛斗亦宜全放仍以當處常平義倉斛斗速加賑救京兆府諸州府應有蝗蟲米穀貴處亦宜以常平義倉及側近官中所貯斛斗量加賑賜災旱之餘撫養尤切眷茲長吏必在得人應遭蝗蟲處刺史委中書門下精加訪察如有煩苛暴虐貪濁懦弱者即須與替邦畿

之內徭役殷繁言念疲人固資矜恤京兆府今年夏青苗
錢宜量放一半應遭蝗蟲及旱損州縣鄉村百姓公私債
負一切停徵至麥熟即任依前徵理及準私約計會其遭
蝗蟲及旱損處準勅添貯義倉每畝九升斛斗去秋合徵
在百姓腹內者並宜放免其天下州府貸種糧子在百姓
腹內者更不要徵閑糴禁錢爲時之蠹方將革弊尤藉通
商其見錢及斛斗所在方鎮州府輒不得擅有壅遏任其
交易必使流行仍委出使郎官御史及所在度支鹽鐵巡
院切加勾當兼委轉運使設法般運江淮糙米於河陰積

貯以備節級賑濟累時以來水旱時有方隅郡府杼柚屢空厚下所以安人袁多由其稱物至於徵斂亦在寬恤應方鎮州府借便度支鹽鐵戶部錢物斛斗經五年以上者並宜放免天下百姓人吏欠太和九年以前官錢斛斗家業蕩盡無可徵納囚繫囹圄動經數年者亦宜放免刑獄之重人命所懸將絕冤濫必資慎恤京城百司及畿甸見禁囚徒委中書門下差官疏理無使冤濫輦轂之下法在肅清奸盜竊發理難容舍親仁坊今年五日賊依前委京兆府左右街使鳳翔邠涇金商同華等州切加捕逐如獲

頭首準法科斷其餘支黨一切不問於戲惟此凶災是彰
菲德情敢忘於罪已惠所貴於及人施令布和期於蘇息
凡厥臣庶宜體朕懷主者施行

遣使宣慰諸道詔

大河而南幅員千里楚澤之北連亘數州近以水潦暴至
隄防潰溢既壞廬舍復損田苗言念黎元罹此災沴或生
業蕩盡或農收索然困餒凋殘豈能自濟是用勤約疚於
中懷今故臨遣使臣詳問病害紓其墊溺之苦申以勞來
之方勉諭師徒安存孤老將我惠澤冀蘇疲人宜令給事

中盧宏宣往陳許鄭滑鄆曹濮等道宣慰刑部郎中崔瑨
往山南東道鄂岳蘄黃道宣慰於戲朕自君臨勵求理道
常恐一物失所每以萬姓爲心誠無感通時有災害夙夜
愧悼不知所然宣示藩方喻茲詔命使寬其徭役禁其侵
漁多方輯綏俾遠完復布告咷庶知朕意焉

彗星再見修省詔

上天蓋高感應必繇乎人事寰宇雖廣理亂盡繫於君心
從古以來必然之義朕嗣膺寶位十有三年常克己以虔
恭每推誠於庶衆將以導迎休應漸致雍熙期克荷於宗

祧思保寧於華夏而德有所未至信有所未孚災氣上騰天文謫見再周期月重擾星躔當求衣之時覩垂象之變兢懼惕厲若蹈泉谷是用舉成湯之六事念宋景之一言詳求譴咎之端採聽消禳之術必有精理蘊於衆情冀屈法以安人爰恤刑而原下應京城百司及諸道州府十一月八日前見禁囚徒未經勅斷者犯死罪並降從流流已下遞減一等其十惡及謀殺人劫盜賊并官典犯贓不在此限諸道今年遭水及蝗蟲州縣人戶等宜委觀察使與州縣長吏計會精加察訪勿憚奏論諸道所有進獻時

新委中書門下更點勘擇減以稱朕意京畿之內百役繁
興欲其阜安切在優恤其今年二月二十五日勅賑貸諸
縣百姓糧種粟八萬四千九百七十八石如聞數內半是
義倉斛斗此乃救災之備豐年自合收積其餘有戶部管
係者並且停徵以俟來歲畿內諸縣應有開成元年以前
諸道逋欠並宜放免仍委度支與府司同簡勘聞奏如是
官吏破用不在此限皇太子葬事十日稍近但令粗及禮
制不必過務虛儀以涉繁冗則須裁減冀無害物夫豈傷
恩易定兩州地里深阻近者守臣喪沒軍中初有異圖累

遣詔書申明事理革心遷善章表繼來張元益出定州後應是初扶樹元益有違朝旨者自將校至於官健委節度使安行慰諭並經放釋如或輒相告訐卻以其罪罪之冀使藩方永無疑懼文武百僚及諸色人有能通達刑政之源參考天人之際隨在各上章疏指言得失乃至徹樂減膳抑亦舊章便當內自指揮不復更形綸翰宣示中外宜體至懷

罷軍將兼充文職詔

應諸道奏請軍將兼巡內州別駕長史判司等近日諸色

入流人多官途隘窄諸道軍將自有衣糧優厚之處仍兼
月俸若更占州縣員闕則文吏無所容身須有申明人知
分限起今已後諸道節度團練防禦等使不得更奏大將
充巡內上佐等官今日已前見任者且依任前守官應京
有司有專知別當及諸色職掌等近日諸司奏請州縣官
及六品已下官充本司職掌援引舊例色目漸多致使勾
留溢於舊額起今已後各於本司見任官僚之中揀擇差
署不得別更奏官如是勅額職名當司無官員相當者即
任準舊例奏請

給裴度俸料詔

司徒兼中書令裴度盛有勲烈累任台衡以疾恙未任謝上須加優異用示恩榮其本官俸料宜起今日便付給所司

禁留獄詔

京城百司及府縣禁囚動經歲年推鞫未畢蓋縣官吏因循致此留獄鬱蒸在候冤滯難堪宜付御史臺委中丞高元裕及強明御史三兩人各就本司應見禁囚分閱案牘據理疏決聞奏

許越王貞元孫女元真請祔葬臨淮公珍以下四
喪於舊塋詔

越王事跡國史著明枉陷非辜尋以洗雪其子珍他事配
流數代漂零不還京國元真弱女孝節卓然啟護四喪絲
厯萬里況是近族必可加恩行路猶或嗟稱朝廷固須卹
助委宗正寺京兆府與訪越王墳墓報知如不是陪陵任
祔塋次上葬其葬事仍令京兆府措使備禮葬畢元
真如願往京城便配咸宜觀安置

答滄景節度使劉約請開義倉詔

本置義倉只防水旱先給後奏勅有明文劉約所奏已爲遲晚宜速賑恤

褒錄王鍔後嗣詔

王鍔累朝宣力王稷一旦捐軀須錄遺孤微申憫念王叔泰委吏部與九品官令主祭祀

流蕭洪詔

蕭洪起自細微恣爲狡妄假我外家之族冒居元舅之尊累忝重官再叨雄鎮作僞無狀從古未聞不處極刑猶爲寬典宜長流驩州百姓洪男恪女婿萬鎮徐國夫人女婿

呂璋並沒杖流嶺南崖象等州

流蕭本蕭宏詔

恭惟皇太后族望遠承齊梁之後僑寓流滯久在閩中慶
靈鍾集早歸椒掖終鮮兄弟常所咨嗟朕自臨御以來便
遣尋訪冀得諸舅以慰慈顏而姦濫之徒探我情抱因緣
州里之近附會祖先之名覬幸我國恩假託我外族蕭洪
之惡跡未遠蕭本之覆轍相尋宏之本末尤更乖戾三司
推鞫曾無似是之蹤宰臣參驗見其難容之狀文款繼入
留中久之朕當視膳之時頗有咨稟恭聞處分惟在真實

丙沐墮桑旣無可驗鑿空作僞豈得更容據其罪狀合當極法尚爲含忍投之荒裔凡百庶士宜體朕懷蕭本今宜除名長流愛州蕭宏配流儋州

罰鄭滑節度使裴宏泰俸料詔

宏泰以慶成令節擅放羈囚雖云竭誠且爲干禁恐開後例須示薄懲宜罰一季俸料

禁國忌日設齋行香詔

朕以郊廟之禮嚴奉祖宗備物盡誠庶幾昭格恭惟忌日之感所謂終身之憂而近代已來歸依釋老徵二教以設

食會百辟以行香將以仰助聖靈冥資福祚有異皇王之
術頗乖教義之宗昨得崔蠡奏論遂遣討尋本末禮文令
式曾不該明習俗因循雅當釐革其兩京天下州府以國
忌日於寺觀設齋行香起今已後並宜停罷

令臺司覆勘賀蘭進興黨與詔

軍司所推鞫妖賊賀蘭進興等五十九人昨令宰司詳覆
推狀款驗節目並無參差緣是妖逆之徒不同尋常刑獄
便令裁斷冀免停留今高元裕及魏暮等論奏請付法司
覆問重慎刑辟與衆棄之斯亦舊章雅當依允其妖賊徒

黨除白身及官健四人依前軍中及狀內推勘餘並宜付
御史臺重覆限三日內聞奏

立潁王爲皇太弟勅當軍國詔

朕顧以眇身獲承丕構嚴恭寅畏十有五年列聖鴻猷朕
豈能荷涉冰匪懼馭朽非難雖宇內小康而大道猶鬱方
自砥礪期臻理平天不祐予夙嬰疾疹政慮多闕心靡遑
安近者凝泣所侵久而寢劇臣僚愛我內外一心禱祀畢
爲藥石備至亟換旬朔有加無瘳懼不能躬總萬幾日釐
庶政稽於古訓謀及大臣用建親賢以貳神器親弟潁王

瀘朕昔在藩邸常同師訓動成儀矩性秉寬仁俾奉昌圖必諧人欲可立爲皇太弟應軍國政事便令權勾當百辟卿士中外庶臣宜竭乃心輔成予志陳王成美先立爲皇太子以其年尚冲幼未漸師資比每念重難不行冊命迴踐朱邸允叶至公可依前復封爲陳王嗚呼萬務不可以久曠萬方不可以乏統惟義所在朕不敢私宣布中外咸令知悉

贈崔琯尚書左僕射詔

孔氏以顏冉之行首於四科漢代以荀陳之門方之八凱

乃睠時哲得茲令名用舉飾終之恩以抒殲良之歎故山
南西道節度使崔琯誠明履正粹密鄰幾有子政之精忠
得公綽之不欲禮樂二事以爲身文仁義五常自成家範
往以茂器列於大僚屬賢相受誣廟堂議法由長孺之道
以佑正人微京兆之言豈聞非罪旣是魏其之直益彰王
鳳之邪莊色於朝羣公聳視讜詞不撓淑問攸歸厯踐名
藩皆留遺愛居常慎獨清則畏知爰自青衿迄於白首勵
翼之志始終不渝未陟台階實辜公論追榮左相式示優
崇可贈尚書左僕射

虔奉祀事詔

宗廟之事朕合親奉其禮但以千乘萬騎動費國用每有司行事之日被衣冠坐以俟旦比聞主者不虔祭器勞敝非事神蠲潔之義卿宜嚴勅有司道吾此意

遺詔

朕以寡昧祗承丕業慕貞觀之至化希開元之中興十有五年勤勞宵旰雖俗未臻於仁壽而物或近於乂寧斯乃羣后叶心豈朕獨致自謂勵精未已理平可期誠不感通宿疾重遘藥石無補至於彌留惟懷懿圖宜有顧託是用

審訓其聽予言皇太弟瀝睿哲明裕孝友溫文忠正寬仁博達周敏必能篤祖宗之休烈闡皇王之令猷宜於柩前即皇帝位仍以門下侍郎平章事楊嗣復攝冢宰軍國務殷豈可久曠以日易月宜遵舊章皇帝三日而聽政二十七日釋服天下節度觀察防禦等使及監軍諸州刺史職守非輕並不得離任赴哀天下人吏百姓告哀後出臨三日皆釋服無禁婚嫁祠祀飲酒食肉釋服之後無禁舉樂文武官等朝晡臨事皆十五舉音宮中當臨者非時毋得擅哭漢文薄葬朕實慕之奉營山陵務從儉約無以金銀

錦綵緣飾喪具醫術之徒夙夜勞苦深可矜念不須加罪
仙韶樂官放歸本司五坊鷹犬並宜解放嗚呼生死常期
今古無異予素知遠何足甚哀咨爾將相卿士内外腹心
爪牙之臣其敬保我太弟輯寧邦家成朕素懷克底于道
布告遐邇咸使聞知